

Sujet:

Zahlsch mit Schilling oder Frangge

Das Joor het unsre Waage e bsundre Raiz.
He jo, lueg gnau, är isch e Baiz,
wo stoot und fahrt und stoot und fahrt
iiber effentlige Boode mit syne Rad.

De derfsch nit gratis iiber effentlige Bode rolle.
Als Baiz haisst's zahle, schitte, brenne, zolle.
Zem Kassiere het's in dr Allmändverwaltig
ain mit ere ganz e bsundere Haltig:

Dr Schillinger Kari, är isch e glatte,
leggt d'Styyrezahler doch glatt uff d'Matte.
Sini Tarif styngen und falle, ganz wie dr Rhy
und är dänggt gar nit Beeses sich drby.
Findet är **Di** doll und glatt,
griegsch persee grad e Rabatt.
Hesch aber e Naase, wo **ihm** nit basst,
griegsch dr dobbleti Tarif verbasst.

Drum koschtet in unsrer Waage-Baiz e Stange Bier
uff dr **lingge Syyte** laider ganzi Frangge vier.

Denn unsere Ex-Obmaa het d'Lizänz bym Kari gholt
und dä het ihm gsait, ganz unverhohlt:
"Mit däm Gsicht und e so wenig Hoor
Koschtet's zwaimool meh wie vorig's Joor."

Druff schigge mir als Unterhändler-Ballerina
zem Schillinger Kari d'Cicciolina,
wo ihn biteert und mit ihm zigglet
und schlussändig um dr Finger wigglet.
Jetzt zahle mir anstatt in Frangge
glychvyyl Lire. Karl, mir dangge!

Drum koschtet, s'glaubt's ain nit elai,
s'Bier uff dr **rächte Syyte** numme no zwai Stai.

Dr Kari herrscht als wie-n-e Keenig.
Im Staatsseggel nitzt das aber wenig.
Gschäft het är gmacht, wo sich nit lohne.
I "Kari, wo sinn unseri Mylioone?"

Baublatz-Gebyyre sinn glyych syt 35 Joor.
Do stehn aim z'Bärg grad alli Hoor.
Parkhuus-Belyychtig, wo nit neetig isch,
fir dr Kari isch das e glaine Fisch.
Container uffstelle uff effentligi Allmänd?
Kennsch dr Kari, leggsch's in syni Händ.
Au Parkhuus-Schilder het är loo glääbe.
Sueche duesch die Schilder doch vergääbe.

Jetzt aber an d'Segg, Regierigsreet,
haltet d'Styrezahler nit fir bleed.
Do no-n-e Herremättli-Gratis-Tip,
wo mir Eych gänn, ganz klar und klipp:
"Machet ebbis, wo sich sofort lohnt
und schiesset dr Schillinger uff dr Mond."

D'Ladärne-Uusstellig isch vom Määntig znacht,
am 9. Merze, bis am Mittwoch demorge, am
11. Merze, uff em Minschterblatz z'gseh.
Mir fraien is uff Ihre Bsuech.